

Rezeki selepas banjir, ikan mungkus jadi buruan

oleh ROSILAWATI ROSEDI 03 Januari 2023 08:40am **Masa membaca: 2 minit**



Aktiviti tahan jaring oleh penduduk terdiri Orang Asli suku Semelai yang tidak ketinggalan menangkap ikan mungkus.

TEMERLOH - Penduduk sekitar Sungai Pahang di sini tidak melepaskan peluang memburu ikan kecil seperti seluang, susuh batu atau pun lebih dikenali dengan ikan mungkus yang keluar dengan banyak selepas banjir.

Penduduk Orang Asli dari suku Semelai menyifatkan fenomena tersebut turut memberikan rezeki tambahan dan hasil tangkapan diperolehi tahun ini lebih lumayan berbanding tahun lalu.



Bujang membawa naik ikan mungkus yang diperoleh di Sungai Pahang.

Perkara itu turut diakui Bujang Sulaiman, 41, dari Kampung Paya Badak di sini yang memberitahu hasil tangkapan diraihinya cukup meriah sejak memulakan aktiviti menangkap ikan beberapa hari lalu.

"Ada satu hari saya dan rakan dapat hingga lebih 13 kilogram (kg) selepas hanya beberapa jam tahan jaring.

"Memang hasil kali ini lebih banyak dan gembira kerana ikan mungkus memang kegemaran keluarga," katanya kepada Sinar Harian.



Bujang

Ikan mungkus ialah sejenis ikan kecil yang bergerak dari hulu ke kuala secara berkumpulan dan lazimnya ia berlaku selepas musim banjir, bergerak menyusuri tebing sungai bermula dari Lipis hingga ke Pekan.

Tambah Bujang, separuh daripada ikan tersebut menjadi santapan mereka selain dijual kepada orang ramai.

"Permintaan tinggi terhadap ikan mungkus yang boleh mencecah hingga RM20 sekilogram," jelas Bujang.



Sebahagian ikan mungkus yang berjaya ditangkap.

Sementara itu bagi Rojilah Supeng, 41, berkata, dia tidak melepaskan peluang bersama ahli keluarga lain menunggu jaring yang ditahan di sekitar sungai tersebut.



Rojilah bersama hasil tangkapan.

"Ikan mungkus sedap digoreng atau dibakar dan semua anak suka ikan ini, bila ada peluang turun memang saya turut serta aktiviti ini," tambah Rojilah.